

唐詩紀事

唐詩紀事卷第二十九

常袞 張衆甫 田登 柳郴 李彥遠

薛尋 元載 張元宗 楊郇伯 高拯

梁鍾 劉長川 姚倫 孫處立 劉復

朱彬 戴叔倫 于鵠 王季文

常袞

晚秋集賢院卽事寄徐薛二侍郎云穆穆上清居沈沈中秘書金鋪深內
殿石甃淨寒渠花樹臺斜倚宮煙閣半虛縹囊鋪錦繡翠軸卷瓊琚墨潤
冰文繭香消蠹字魚翻黃桐葉老吐白桂花初舊德雙遊處聯芳十載餘
北朝榮庾薛西漢盛嚴徐侍講親華辰徵詩步綺疏綴簾金翡翠賜硯玉
蟾蜍移秩東南遠離憂歲月除承明期重入江海意何如

衰京兆人爲中書舍人文采贍蔚長於應用譽重一時相代宗用人非文
詞者擯不用世謂之諧伯

衰晚秋夕集賢卽事詩司空曙和云藹藹鳳凰宮蘭臺玉署通夜霜凝樹
羽晚日照相風官亞三台貴儒開百氏宗司言陳禹拜侍講發堯聰香卷
青蒲內鉛分綠字中綴籤從太史鏘珮捐羣公池接天泉碧林交玉果紅
寒龜登故葉秋蝶戀疎叢顏謝徵文並鍾裴直事同離羣驚海鶴屬思怨
江楓地遠姑蘇外山長越絕東慚當哲匠後下曲奏難工獨孤及和云漢
家金馬署帝座紫微郎圖籍凌羣玉歌詩冠柏梁陰陰萬年樹肅肅五經
堂揮翰忘朝食研精待夕陽晴空露盤迴秋月鎖窗涼遠興生班鬢高情
寄縹囊歲夥雙鸞鷺夙昔並翬翔汲冢同刊謬蓬山共補亡差池摧羽翮
流落限江湘禁省一分袂晏一作天二雨霜石渠遺跡滿水國暮雲長早晚朝宣室歸時道路光錢起和云文星垂太虛辭伯綜羣書綵筆下鴛掖
褒衣來石渠典墳探奧旨造化覩權輿述聖魯宣父通經漢仲舒窗明宜
對連雲閣晴聞過闕車舊僚云出矣晚歲復何如海嶠瞻歸路江城夢直

廬舍毫思兩鳳望遠寄雙魚定笑巴歌拙還參麗曲餘

張衆甫

鶴詩云馴狎經時久襯襯短翮存不隨淮海變空媿稻梁恩獨立秋天淨
單棲夕露繁欲飛還歛翼誰敢望乘軒

戴叔倫酬衆甫詩云野人無本意散木任天材分向空山老何言上苑來
迢遙千里道依倚九層臺出處寧知命輪轍豈自媒更慚張處士相與別
蒿萊

衆甫送李觀之宣州謁袁中丞詩云古渡大江濱西南據要津自當舟檝
路應濟往來人翻浪驚飛鳥迴風起綠蘋君看波上客晚歲獨垂綸

高仲武云衆甫婉媚綺錯巧用文字工於興喻只如不隨淮海變空媿稻
梁恩盡陳謝之源又自當舟檝路應濟往來人得諷興之要形容體裁率
皆如此文流之佳士也

衆甫字千初清河人年過耳順方脫章甫冠惠文爲太常寺太祝尉河南

壽安縣罷秩僑居雲陽時以緣情比興疏導心術志之所之輒詣絕境後拜監察御史爲淮寧軍從事建中三年卒

權載之
其墓誌

田登

毛本云
一作澄

成都爲客作詩云蜀郡將知遠城南萬里橋衣緣鄉淚溼貌以客愁銷地富魚爲米山芳桂是樵旅遊唯得酒今日過明朝

登大歷天寶間人杜子美贈獻納史起居田舍人詩卽登也末句云楊雄更有河東賦惟待吹噓送上天蓋登以舍人奉使入蜀肅宗時人也

柳郴

郴與李端盧綸友善有賊平後送客還鄉詩云他鄉生白髮舊國有青山最有思致尤長於短句如贈別云江浦程千里離樽淚數行無論吳與楚俱是客他鄉又云何處最悲辛長亭臨古津往來舟檝路前後有離人
郴大曆間進士

李彥遠

採桑云採桑畏日高不待春眠足攀條有餘愁那矜貌如玉千金豈不贈
五馬空躑躅何以變貞性幽篁雪中綠

彥遠大曆貞元間詩人

薛昂

勅贈康尙書美人云天門喜氣曉氛氲聖主臨軒召冠軍欲令從此行霖
雨先賜巫山一片雲康尙書日知也德宗時斬李惟岳以功擢爲深趙節
度遷奉誠軍陟晉絳

畢德宗時河東詩人也

元載

王忠嗣鎮北京以女韞秀歸元載歲久而見輕韞秀勸之遊學元乃遊秦
爲詩別韞秀曰年來誰不厭龍鍾雖在侯門似不容看取海山寒翠樹苦
遭霜霰到秦封妻請偕行曰路掃饑寒跡天哀志氣人休零別離淚攜手

入西秦

元到京屢陳時務深符上旨肅宗擢拜中書王寄諸姊妹詩曰相闈已隨
麟閣貴家風第一右丞詩笄年解笑鳴機婦恥見蘇秦富貴時元肅代兩
朝宰相貴盛無比復爲一篇以喻之曰楚竹燕歌動畫梁春蘭重換舞衣
裳公孫開館招佳客知道浮雲不久長

元貪慾被誅上令王氏入宮歎曰二十年太原節度使女十六年宰相妻
誰能爲長信昭陽之事死亦幸矣京兆笞斃

大曆五年春載早朝有獻文章者公令左右收之其人若欲公讀公云候
入中書當爲看其人言若不能讀自誦畢因亦不見詩曰城東城西舊行
處城裏花飛亂如絮海燕銜泥欲下來屋裏無人欲飛去載後破家妻子
被殺其一云城南路長無宿處荻花紛紛如柳絮海燕啣泥欲作巢空室
無人卻飛去

張元宗

登景雲寺閣云胡馬飲河洛我家從此遷今來獨垂淚三十六峯前

望終南山云紅塵白日長安路馬足車輪不暫閒唯有茂陵多病客每來

高處望南山

楊郇伯

妓人出家云盡出花鉢與四隣雲鬟翦落厭殘春暫驚風燭難留世便是
蓮花不染身貝葉欲翻迷錦字梵聲初學誤梁塵從今豔色歸空後湘浦
應無解佩人

竇常途中立春寄懷郇伯云浪跡終年客驚心此地春風前獨去馬澤畔
耦耕人老大交情重悲涼物外親子雲今在宅應見柳條新

高拯

拯及第後贈試官云公子求賢未識眞欲將毛遂比常倫當時不及三千
客今日何如十九人

拯大曆十三年進士試官薛邕也

梁鍾

七夕汎舟云雲端有靈匹掩映拂妝臺夜久應搖珮天高響不來片歡秋
始展殘夢曉翻催郤怨填河鵲留橋又不回

詠木老人云刻木牽絲作老翁雞皮鶴髮與真同須臾弄罷寂無事還似
人生一夢中

古意云妾家巫峽陽羅幌寢銀牀曉日臨窗久春風引夢長落釵仍在鬢
微汗欲消香縱使蒙籠覺魂猶逐楚王

錢起秋夜與鍾文宴云車到閒林下林香蕙草時好風能自至明月不須
期秋水翻荷影晴雲脆柳絲微官是底物許日廢言詩

明皇雜錄云李輔國矯制遷明皇西宮高力士竄嶺表帝戚戚不樂日一
蔬食吟詩云刻木牽絲作老翁至一夢中不知明皇作或詠鍾詩也

劉長川

寶劍篇云寶劍不可得相逢幾許難今朝一度見赤色照人寒匣裏星文
動環邊月影殘自然神鬼伏無事莫空彈

將赴東都上李相公云四海兵初偃平津閣正開誰知大爐下還有不然
灰

長川肅代時詩人也

姚倫

感秋云試向疎林望方知節候殊亂聲千葉下寒影一巢孤不蔽秋天鴈
驚飛夜月烏霜風與春日幾度遣榮枯

倫過章秀才洛陽客舍云達人心自適旅舍當閒居不出來時徑猶看讀
了書晚山嵐色近斜日樹陰疎盡是忘言客聽君誦子虛

高仲武云姚子詩雖未洪深去凡已遠屬興比事不失文流如亂聲千葉
下寒影一巢孤亦篇章之秀也

倫終揚州大都府曹參軍

孫處立

詠黃鸝云欲囀聲猶澀輕飛羽未調高風不借便何處得遷喬

處立江寧人長安中爲左拾遺善屬文嘗恨天下無書以廣新聞神龍初桓彥範等用事處立遺書論時事得失不用乃去官還鄉以病卒

劉復

寺居清晨云高枕對曉月衣巾清旦涼露華朝未晞滴瀝含虛光隔竹聞汲井開扉見焚香幽心感衰病結念依法王青冥早雲飛杳眇空鳥翔此情皆有釋悠悠知所忘

經禁城云日沒路且長遊子欲涕零荒城無人路秋草飛寒螢東南古丘墟莽蒼馳郊坰黃雲晦斷岸枯井臨崩亭昔人竟何之窮泉獨冥冥蒼苔沒碑版朽骨無精靈俛仰寄世間忽如流波萍金石非汝壽浮生等臊腥不如學神仙服食求丹經

遊仙云稅駕倚扶桑逍遙望九州一二老佐軒轅移戈戮蚩尤功成棄之去乘龍上天遊天上見玉皇壽與天地休俯視崑崙宮五城十二樓玉母何窈眇玉質清且柔楊袂折瓊芳寄我天東頭相思千萬歲大運浩悠悠安

用知吾道日月不能周寄音青鳥翼謝爾碧海流

送王倫詩云春天日未曛楚客酣送君翩翩孤黃鶴萬里滄洲雲四方各有心豈得常顧羣山連巴湘遠水與荆吳分清光日阻修尺素安可論相思寄夢寐瑤草空氣氤

出三城別幕中三判官詩云翔禽託高柯倦客念主人恩義有所委四海同一身況皆廣大姿翰晉見良辰陳規佐武略高統據要津常願投素誠今果得所申金罍列四座廣廈無氛塵留連徂暑中親望歷數旬河山險以固士卒勇且仁飾裝去未歸相追越城闉愧無青玉案緘佩永不泯復登大曆進士第嘗爲水部外郎爲石洪父平墓銘

朱彬

丹陽作云暫入新豐市猶聞舊酒香抱琴沽一醉盡日臥垂楊

彬大曆貞元間詩人

戴叔倫

字幼公潤州人師事蕭穎士爲門人冠劉晏管鹽鐵表主管湖南至雲安
楊惠琳反馳客劫之曰歸我金幣可緩死叔倫曰身可殺財不可得乃捨
之累遷至容管經略德宗嘗賦中和節詩遣使者寵賜代還卒早行寄朱
山人放云山曉旅人去天高秋氣悲明河川上沒芳草露中衰此別又萬
里少年能幾時心知剡溪路聊且寄前期

和汴州李相公勉人日喜春云年來日日春光好今日春光好更新獨獻
菜羹憐應節徧傳金勝喜逢人煙添柳色看猶淺鳥踏梅花落已頻東閣
此時聞一曲翻令和者不勝春

吳明府自遠來留宿云出門逢故友衣服滿塵埃歲月不可問山川何處
來倚城容弊宅散職寄靈臺自此留君醉相歡得幾迴

除夜宿石頭驛云旅館誰相問寒燈獨可親一年將盡夜萬里未歸人家
落悲前事支離笑此身愁顏與衰鬢明日又逢春

客舍與故人偶集云天秋月又滿城闕夜千重還作江南會翻疑夢裏逢

風枝驚暗鵠露草覆寒蛩羈旅長堪醉相留畏曉鍾

送友人東歸云萬里楊柳色出關逢故人輕煙拂流水落日照行塵積夢
江湖闊憶家兄弟貧徘徊灑亭上不語自傷春

姚合取爲極玄集

送謝夷甫宰鄆縣云君去方爲縣干戈尙未銷邑中殘老小亂後少官僚
廨宇經山火公田沒海潮到時應變俗新政滿餘姚

高仲武云叔倫爲人溫雅善舉止無賢不肖見皆盡心在租庸幕數年夕
惕靡怠吏部尚書劉公與禮部員外張繼書云博訪選材揖對賓客如戴
叔倫其見推稱如此詩體雖不中越格然廨宇經山火公田沒海潮亦指
事造形之工者其骨氣稍輕故詩亦少

于鵠

鵠野田行云日沒出古城野田何茫茫寒狐上孤冢獵火燒白楊昔人未
爲泉下客若到此中還斷腸

題隣居云僻巷隣家少茅簷喜並居蒸梨常共竈澆薤亦同渠傳屐朝尋

藥分燈夜讀書雖然在城市還得似樵魚

寄盧儼員外秋衣詞云寄遠惟以心心誠亦難知篋中有秋帛裁成遠客
衣縫製雖女工尺度手自持容貌常目中長短不復疑針縫密且堅遊客
多塵緇意欲都無言澣濯耐歲時殷勤託行人傳語慎勿遺別來年已老
亦聞鬢成絲縱然更相逢握手唯是悲所寄莫復棄願見常相思

買山吟云買得幽山入漢陽槿籬疎處種桄榔唯有獮猴來往熟弄人拋
果滿書堂

山中寄樊尚書云郤憶東溪日同袍是魯儒僧房閒共宿酒肆醉相扶江
上雙旌貴山中病客孤無媒還有計春谷種桑榆

鵠大曆貞元間詩人也爲諸府從事居江湖間有卜居漢陽及荊南陪樊
尚書賞花詩其自述曰三十無名客空山獨臥秋豈以詩窮者耶

襄陽席上作云老大看花猶未足沿江遇得一枝紅日斜人散東風急吹

向誰家明月中

毛本云御覽集題作襄陽看花時因小蠻作自小看花情不足江邊尋得數枝紅黃昏人散春風起吹落誰家明月

送死多於生幾人得終老句右張爲取作主客圖

張籍傷鵠詩云野性踈時俗甫命一作再拜乃從軍氣高終不合去如鏡上塵

鵠送客遊邊云若到并州北誰人不憶家寒深無去伴路盡有平沙磧冷

唯逢鴈天春不見花莫隨邊將意垂老事輕車

江南曲云偶向江邊採白蘋還隨女伴賽江神衆中不敢分明語暗擲金

錢卜遠人

韋莊集毛本云集又玄

張籍贈王建云于君去後交遊少東野亡來篋笥貧賴有白頭王建在眼前猶是詠詩人

王季文

季文字宗素池陽人少厭名利居九華遇異人授九仙飛化之術曰子當先決科於詞籍後策名於真列冥注使然不可移也登咸通中進士第授秘書郎尋謝病歸九華日一浴於山之龍潭寒暑不渝

季文九華山謠云九華崢嶸上南陸蓮花擢本山半腹翠屏橫截萬里天
瀑水落深千丈玉雲梯石磴入杳冥俯看四極如中庭丹崖壓下廬霍勢
白日隱出牛斗星杉松一歲抽數尺瓊草夤緣秀層壁南風拂曉煙霧開
滿山葱蒨鋪鮮碧雷霆往往從地發龍臥豹藏安可別峻極遙看憂昊蒼
挺生豈得無才傑神仙憚險莫敢登馭風駕鶴循丘陵陽烏不見峯頂樹
大火尙結嵒中冰靈光爽氣曛復旭晴天倒影西墜滌具區彭蠡夾兩傍
正可別作一嶽當少陽